



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Пренумерата в краю:
30 грошей місячно,
80 „ квартално
1.50 „ полрочно,
3 зл. рочно.
В Америкі: 1 дол. рочно.
В Чехословакии:
2 кор. місячно, 10 кор. полрочно,
20 кор. рочно.
Контото чекове Нр. 404.155.

Всіх читателів, котры не вплатили ище пренумераты, просиме выровнати якнайскорше рахунки.

Также просиме присылати членскы вкладкы до Лемко-Союза.

Просиме присылати материал до календара на рок 1936.

По „Святі Гор“ в Закопаном.

Дня 11. серпня т. р. закончили ся торжества звязаны со „Святом Гор” в Закопаном. В том святі приняли участь всі жителі карпатских гор и многочисленны массы народа. Приехали там гуцулы, бойкы и лемкы и каждый повіт мал там свою репрезентацию. Группы тоты пописовали ся своима пісьнями, танцами и звичаями и давали возможность познати себе численным масам участников. Взаимне познакомленє ся широких кругов нашей общественности єст доконче потребне, бо, як выказало тото „Свято Гор” в Польщі мало кто чул и знає о гуцулах, а назвы: бойкы и лемкы сут для загала совсем незнаны. В Закопаном, коли выступал лемковскый хор с Крыницы, можна было чути такы поясненя о лемках: „лемкы, то люды с міста Лемкова”, або „лемкы живут в восточной Галичині”, але о том, же лемкы живут в повітах ліском, сяночком, короснянском, ясельском, горлицком и новосандецком и же они сут руснаками, не знал праві никто. Не знали того не лем звичайны истребителі хліба, але также журналисты численных газет выказали полну игноранцию и невіжество.

И аж лемковскый хор с Крыницы, котрый под руководством г-на Александра Ропицкого отспівал цілый ряд лемковских и загально-руских пісьней, познакомил широки круги о том, же руске населенє жиє аж по Попрад и Дунаец, же тото населенє має свою отрубну, непольску культуру и свои прекрасны народны пісні, котры на конкурсі заслужили собі перше місце серед всіх пісьней горских.

Тото выступленє лемков в Закопаном принесло лемкам значно большу користь, як численны научны росправы и записаны цілы шпальты газет о Лемковщині, бо научны росправы, або газеты читают лем дакотры люды, котры интересуют ся даном квестіом, а в Закопаном чула руску лем-

ковску пісьнь 40-тысячна толпа народа, приїхавша со всіх закутин Польщи, и тота толпа познала нас и переконала ся очевидно, кто мы и где мы жиєме. Крыницкый хор своима артыстычно обробленыма пісьнями добил ся в Закопаном такой славы, же само появленє ся г-н Ал. Ропицкого и нашей группы вызывало у участников громкы рукоплесканя, а заряды великих санаторий, як учительска и „Червеного креста” просили крыницкый хор дати у них концерт. Крыницкый хор співал также до радио, а головный комітет по устройству „Свята Гор” предложил г-ну Ропицкому співати наши рускы церковны пісні в часі Службы Божой, на котрой присутствовал Г-н Президент. Заспіваны пісні: „Иже Херувими” и „Отче наш” звернули на себе загальну увагу своим прекрасном мельодиом и артыстичным выконанєм.

Ціль устройства „Свята Гор” єст взаимне запознанє звичаев, обычаев, пісьней, танцов и народного промысла всіх жителей гор, котры мають подобны условия жита и такы самы потребности и злучити горске населенє в оден союз, котрый старал бы ся:
1) Поднести горскы терены под взглядом культуральным и господарчим. 2) Утворити с тых теренов місце літного отдыха для городского населеня и дати городскому населеню дешевы и здоровы поміщеня. 3) Розвинути в горах годовлю овец и рогатой живины и утворити образцовы кошары и оборы. Розвинути промысл молочарскый через выробы сыров. В той ціли належит устраивати прогулки до Альп, особенно до Швайцарии, штобы познакомити ся с годовльом живины у них и со способами господаркы молочной и выробу сыров. 4) Перевести будову дорог и регуляцию рік и потоков, а также побудовати на ріках тамы, обезпечаючи нас перед выливами.

б) Стремити до зміны в законодательстві для горских господарств рольных. б) Розвивати промысл народный, опертый на основах региональных. 7) Познати взаимно одеджу, звичай и культуру ріжных регионов горских. 8) Стремити до пошанованя прав народных и державных.

Задачи и потребности населеня, жиючого в горах пояснил прекрасно в своей бесіде г-н генерал Галица, котрый в присутности Г-на Президента, заявил, же всі жителі гор мають одну общу черту, а именно велику любовь свободы. Єст то населенє хоробре, отважне, рыцарске и благородне, але не терпит ярма. Свідчат о том численны легенды, преданя и пісні о збойниках, котры предпочитали жите в лісах над ярмо войсковой службы. Тота любовь свободы переховала ся дотепер и прото никто не може думати о вынародовляню населеня гор. Неменше однак міродательны круги здают собі справу со значеня той одынокой природной границы, яком сут Карпаты и тому мусят дбати о тото, штобы місцево населенє было лояльне и певне. При конци своей бесіды заявил г-н генерал Галица, же єго стараня, яко сына тых гор, будут ити в напрямі поднесеня культурального и економического горских теренов.

Закладайме кооперативы.

С кым не бесідовати, каждый наріче. Наріче господар на высокы податкы и низкы ціны [рольных продуктов, [нарічут цілы ряды нашей молодежи на недостаток роботы и закрытє эмиграции, нарічут ремесельники и купцы, а уж найбільше наріче тота наша молодеж, котра покончила школы и не може достати занятя. В урядах пере-

полнене, не принимают никого и молодой, безработной интеллигенции прибывают с каждым роком. Для той то интеллигенции мусит найти ся даяке занятє, бо иначе она змарнує ся. Зле робят вшиткы тоты, котры оглядають ся и ждуть на посады в урядах, бо о тоты посады єст в теперешных часах барз трудно. Для приміра подам, же в самой Куратории Окp. Шк. Крак. лежить перешло 4000 подань о учительскы посады, а рочно освободжат ся там посад около 250. В инших урядах стан єст приблизительно такой самый, нич адже дивного, же поданя або вертають, або лежат цілы роки неполагоджены в урядах. Тымчасом молодеж сидит безчинно, тратит віру в людей и власны силы, падає духом и нариче на всіх и на вся. Она, вмісто ободряти окружающих, настроює их песымистычно, што в результаті може оказати ся шкодливе.

Штобы до того не допустити, тота молода интеллигенция по селах мусит старати ся найти удержанє в родном селі и найде єго напевно, закладаючи и ведучи сельскы кооператывы. Передовсем треба звернути увагу на кооператывы продуктивны, бо тоты мають найбільши виды доброго розвита. Єст у нас много сел, в котрых господары мають добры коровы и много молока, але тото мслоко не дає им доходов, бо нит кому продати молоко. В таких селах належит закладати молочарні и тым сдособом увеличити доходы с господарства. При молочарні буде розвивати ся также склеп. Кооператывны склепы падають у нас часто через боргы. При молочарнях тота опасность отпадат, бо господар дає молоко до молочарні, — за достарчене молоко одержує заплачу каждого місяца и тьма грошами платит за побраный в місяці товар. Где нит добрых условий на основанє молочарні, там треба основати сам кооператывный склеп, але мусит ся доконче принять засаду не давати товар на борг. Лучше, нехай товар лежит в склепі, бо як єго розборговати, то потом часто нит ани грошей, ани товару. Початково уторг буде невеликий, але поволи люды привыкнут и єсли товар буде добрый и невысока ціна, то напевно уторг буде увеличати ся с каждым місяцем.

При таких кооператывах найде занятє наша безработна интеллигенция. Початково не заробит она много, але жиючи при родині, медже своима, потрафит выжити. Счасом добре ведены кооператывы мусят розвинути ся и можут принести селу великы користи, а ведучому тоты кооператывы обезпеченый и независимый быт.

При том не треба забывати и о том, же єст то одынокый способ организации наших сел. Лем постоянным, систематычным трудом можна села организовать и поднести экономично и культурально. Всякы мимолетны лекции, рефераты и бесіды не дають селу жадной користи, люды расходять ся по бесіді по домах и забывают о том, што чули. Лем втотчас, єсли в селі находит ся человек, котрый переводит обговорене в рефератах діло, выголошена бесіда не иде на марне, иначе, щкода часу и выдатков.

Тому то, молоды сельскы интеллигенты, не падайте духом и не ждуйте на посады, але розгляньте ся по селах и начинайте роботу для себе и для села. Початок буде трудный, але тым не зражайте ся, бо жде вас велика заплача, — благодарность людей, для котрых вы положите ваши труды и обезпеченый, независимый быт.

Як будеме голосовати при выборах.

Дня 14. т. м. выборчи коллегии выбрали кандыдатов на послов. В каждом выборчом округі выбрано наименьше 4 кандыдатов, але число их може выносити аж и 16. Каждый выборчий округ выберат по двох послов с тых кандыдатов, якы сут выбраны через выборчи коллегии.

Перед выборами, котры отбудут ся дня 8. вересня т. р., достанут обводовы комиссии карткы с выписаныма, всіма кандыдатами на послов. Таку картку достане каждый выбератель. Если выбератель отдаст тоту картку так, як ю достал, то значит, же он отдає свой голос на двох кандыдатов, помещеных на двох перших місцах той карткы. Если выбератель хоче отдати свой голос на кандыдата, помещеного на третом, або четвертом місци, то мусит назвиско того кандыдата, на котрого хоче отдати голос, подчеркнуты ленийком.

О том мають памятати всі выбератели, бо не все на першом и другом місци карткы буде выписане назвиско тото кандыдата, на котрого люды захотят отдати свой голос, тому найліпше буде, єсли каждый выбератель перед отдаєм карткы, подчеркне ленийком назвиска тых кандыдатов, котрых хотіл бы, щтобы их выбрано послами.

Право голосованя мають лем тоты люды, котры сут помещены в списі выберателей. Если когоси пропущено в том списі и он не реклямовал своего права до дня 14. т. м. — такой утратил свое право голосованя.



Нилько овочей ідять люды.

По найновшим научным дослідам человек повинен їсти пересічно 20 декагр. овочей денно, потребных до нормального розвита организма. Выносит тото 72 кг. рочно. Діти потребуют больше овочей.

В Польщі дрипадат пересічно 30 кг. овочей рочно на одного человека, аджек не іме ани половины потребных для организма овочей. В Чехословакии ідять уж больше овочей, бо рочно припадат на одного жителя 40 кг. овочей, в Англии — 120 кг. а в Америкі — 180 кг., бо там овочи становят конечну часть каждой їды.

Барз дуже овочей ідять народы полудневы, особенно помаранч, бананов и винограда, котры там сут дешевы и доступны для каждого.

Як видиме с того, у нас ідять за мало овочей и тото отбиват ся шкодливо на нашом здравю. Тож для власного добра и здравя дітей старайме ся закладати сады, щтобы тым способом придбати добрый и здоровый для организма корм.



Чистота в хлівах запобігат хворотам у безрог.

Свиня єст звірятом о неособенно великой вартости и прото ліченє звычайно не оплачат ся, тым больше, же вылічити свиню єст трудно. Прото усилия господаря повинни ити в напрямі недопущеня до хворот у свиней, а даст ся тото зробити через удержанє кутчиков в чистоті, продув, світло в кутчиках и побыт свиней на пасовиску.

Помимо того безрогы западають часто на ріжны заразливы хвороты, котры нераз навиджують свині поголовно.

Перебіг хвороты єст звычайно острый, процент смертных случаєв єст высокий. Ліченє свиней єст утяжливое и трудное и добрый результат ліченя єст рідкий. Тому найлучше єст обезпечати свині перед дакотрыма хворотами. Перед червонком примінят ся с добрым результатом щепленє предохранне. Против другим звірятам може обезпечити нас лем образцова чистота, котру належит перестерегати так точно, жебы не впустити до хліва никого чужого.

Як велике значенє має чистота в годовлі свиней, выстарчит навести случаи заразливого роненя беременных льох. Взагалі заразливое роненє у звірят єст знане, а выкликуют єго микробы, котры называют ся бактерии Банга. Тоты бактерии найдено также у льох, котры поронили. Другыма словами, пороненє у коров и свиней было выкликане тьма самыма хворототверческыма бакцьялами.

Понєже однак безрогы назагал не падали заразливому роненю, не можна было пояснити собі той справы. Аж по близших дослідах показало ся, же льоха сожерла ложиско коровы, хворой на заразливое роненє коровы. Тепер стало ся всьо ясне: свиня заразила ся от хворой коровы. Коли льохы отділено от хворых коров, не было больше случаєв заразливого пороненя у льох. С того видно, же при перестереганю чистоты и переписов гигиены можеме запобічи хворотам и повстающим с хворот втратам.



Молоды Лемкы користайте с нагоды!

В другой половині вересня т. р. открыват ся в Вороблику Королевском 2-літний дяковский курс кля кандыдатов Лемковщины. На курсі будут ся преподавати слідуочи предметы: 1) Закон Божий 2) Церковный спів 3) Церковный устав (тыпикон) 4) Церковно-славянский и русский язык 5) История Церкви и история Руси 6) Оправа книг 7) Фотографованє 8) Веденє хоров и аматорских кружков 9) О кооперации и организации села.

Оплата за науку 50 злотых рочно. Удержанє на власный кошт. Будут ся принимати лем кандыдаты с добрым голосом.

Прошения на адресу: Стефан Пильх, Вороблик Королевский, почта Вороблик Шляхотский належит вносити сейчас со слідуочима приложениями: 1) Свідоцтво крещеня 2) Свідоцтво нравственности 3) Послідне свідоцтво школьне 4) Рекомендательне писмо Орган. Лемко-Союза 5) Почтова марка на отвіт.

Правленє Дяковского Заведеня.



ПОМІЩАЙТЕ
ОГОЛОШЕНЯ
В ГАЗЕТІ „ЛЕМКО”

Страшна буря над Краковом.

В середу, дня 14. т. м. около години 10 вечером перешла над Краковом страшна буря с перунами и шаленым вітром. Шаліюча вітерница через 1½ години нанесла величезны шкоды и спричинила парудесят несчастных случаев. Величезны массы воды заляли ціле місто и унеможливили трамвайну комуникацию. Плянты представляют оден образ знищення. Вітер вырвал с коренями, або поломил парусот старых дерев. Гром ударил в електровню, погружаючи місто в темноті.

На перифериях міста завалило ся кілька хат, а оден гром розвалил комин фабрыкы. Поперываны електричны переводы, падаючи гзымсы и цеглы, поранили много людей. Ряд улиц єст завалены поломаныма деревами.

В спасательной акции, котра тревала кілька годин, принимала участь пожарна сторожа и войско.

Місто представлят трагичный вид розвалины и знищення, а населенє пережило страшный час.

ЯК ЛІЧИТИ ГРУДУ У КОНЯ.

В часі дощей, коли коні ходят много по болоті, достають они часту на ногах так звану груду. В таких случаях потреба выстричь серсть с болячого місца, а саме місце вымыть літном водом с мылом. По вымытію ноги треба ю старанно вытереть ватом. Рано и вечером маже ся боляче місце цынковым мастьом, котру при сухой груді мішат ся с рыцыновым оліом в пропорции на 4 части цынковой масти одну часть рыцыны. При мокрой груді уживати самой цынковой масти. Через цілый час лічення ноги, што треває звичайно 7 до 10 дней, не можна мыти ноги водом, ани обвивати шматами. Треба уважати, штобы конь не стоял на гною, а перед мазанєм масти обтерати ногу чистом и мягком шматком. В часі лічення не можна коня запрягати до работы.

СОВІТЫ ПОСЫЛАЮТ ЯЧМЕНЬ ДЛЯ ИТАЛИАНСКИХ ВОЙСК В АФРЫЦІ.

С Лондона доносят, же правительство италянске закупило в Совітах 9000 тон ячменя, Perezначеного для войск афрыканских. Ячмень тот має быти высланный безотложно до всходной Африкы. Дальши транспорты мають послідовати в продолженю вересня.

БУДОВА НАРОДНОГО ДОМА ИМ. БР. ПЕРАЦКОГО.

С рамени головного комитета чествованя памяти бл. п. министра Бр. Перацкого приїхал до Нового Санча заступник министра Доляновский и конферовал с председателем місцевого комитета д-ром Лахом.

На конференции усталено термин перенесеня мощей бл. п. министра Перацкого с городского кладбища до побудованого мавзолея.

Обговорено также будову Народного Дома им. Бр. Перацкого в Новом Санчі.

Перенесенє тіла и поблагословенє угольного камня помянутого высше дома послі-

дує с концом того місяца, або на початку вересня.

НЕ ВЫШМАРЯЙМЕ ШКАРЛУП С ЯИЦ.

Шкарлупа с яиц містит в собі 90 процент вапна. Прото она може добре надавати ся на навоз. Потолчену дробно и розмоклу в воді шкарлупу уживає на навоз до подливаня квітков. Змелена шкарлупа єст также добрым навозом. Змелена шкарлупа, змішана с білком и нзгашеным вапном дає добрый кит до клеєня порцеляны. Масны фляшкы и слоикы чистит ся добре потолченом шкарлупом, змішаном с посіканыма дробно картофлями. При праню біля доданы до воды в пропорции на 1 л. воды одна або дві шкарлупы причиняют ся до того, же білє стає ся білійше. Шкарлупа клярує также и чистит всякы галареты и юшкы. Шкарлупу аджек треба ховати и не вышмаряти, бо и она може быти в господарстві придатна.

ТУНЕЛЬ МЕДЖЕ ЯПОНИОМ И КОРЕОМ.

Японске правительство затвердило плян японских инженеров, котрый предвиджує будову подморского тунеля медже Японием и Кореом. Такой плян єст уж давно готовый, але аж тепер правительство чує ся в силах начати работы, котры будут коштвати полтора миллиарда єн. Тунель тот має мати 155 км. долготы и работа єго займе около 10 літ. По выбудованю того тунеля буде можна от нас достати ся поїздом до Японии. Тунель тот однак будує ся для цілей войсковых, бо обчисляют, же легче и скорше можна перешмаряти войско сухопутныма дорогами, як морьом.

РОСПОРЯДЖЕНЄ ВОЄВОДЫ КРАКОВСКОГО В ДІЛІ ПРОДАЖИ ЧАСОПИСЕЙ.

В Краковском Дневнику Воєводском Ч. 16. с дня 15. липня т. р. появило ся розпорядженє Воєводы Краковского о продажи часописей на терені Краковского Воєводства. Розпорядженє того обовязує от дня 19. липня 1935.

Понеже в силу § 13. того розпорядженя властители существующих в том часі, коли начинат обовязовати высше наведеное розпорядженє, підприємств кольпортажа и издательств, а также місц сталой продажи часописей, мають в продолженю 14-тох дней приминити ся до переписов §§ 1—6 и 9. того розпорядженя. Староста Новосанецкый просит начальства громад и сел возвати всіх заинтересованных до точного перестеріганя высше наведеных переписов и звертат увагу на постановленя карны § 12. того розпорядженя.

ОПЛАТЫ ЗА ЕКЗАМЕНЫ В ГИМНАЗИЯХ ФАХОВЫХ.

Министерство Просвіщеня усталило оплаты в новоутвореных фаховых гимназиях. Такса за экзамен до клясы першой выносит 5 зл., а вписове 10 злотых.

НЕ ВВОДТЕ НЕЗГОДЫ!

Село Костаровцы занимало перед войном одно с перших місц в сяноцком повіті. Была у нас читальня им. М. Качковского, до котрой сходила ся молодеж, читала книжкы газеты и проводила користно час. Аж выбухла война и власти закрыли читальню, а наилучших труженников забрала в Талергоф. По войні в р. 1934. отновлено чит. им. М. Кач. и вписало ся до ней дост поважне число людей, так старших, як и молодежи. При читальні существуете аматорский кружок, котрый устроує часто театральны представления, с котрых доходы идут на потребности читальні. Читальня має дост простору салю, котру вынанимат от сельского кооператыва. Культура и организацийна работа поступат скоро вперед и того именно не подабат ся замотыличеным червачкам украинским, котры хотіли бы подгрысти кріпку и здорову Русь. Робят они што могут, штобы пошкодити читальняному труду, але штож, силы слабы, всіх украинчиков у нас лем чотырох, тож и зробити ничего не могут. Дивує нас однак того, же хотят они розбивати єдинство и згуду в селі, бо оден с них, то якийси кус вчєный, был аж учителем, а два инши то братья священника и то руского, котрый за любовь своєго руского имени терпіл в Талергоф, а четвертый, хоц не дуже учил ся, але все был в Кросні и якийси час фикал ногами по ткацких варштатах, тож повинни всі мати на тилько розума и зрозуміти, же згода будує а незгода руїнує. Не хочу на разі наводити назвиск тых людей, ани дакотрых штучок, на якы позвалят собі пан ткач, бо вірю, же они увидят и переконают ся же с русских Костаровец украинны не зробят и начнут трудити ся разом з нами. На разі раджу им щиро, не перешкадайте нашим читальнякам в их користой для села работі и не вводте до села незгоды, бо кто вітер сіє зберат бурю.

Побивач Филип.

БАНДЫТЫ ГУЛЯЮТ.

Прошлой неділі, с пятницы на субботу пришел якийси бандыт до Ростокы Великой пов. новосанецкого и хотіл достати ся до місцевої школы. Не могучи выважити двєри, выбил он три окна. Сполошенный, збіжал, не укравши нич.

РЕДАКЦИЯ НЕ ОТВІЧАТ:

50 зл. денно заробит каждый, кто займе ся продажом ревелацийного, патентованого вынахода. Каждый склепар, желаючи увеличити свои обороты, повинен держати в склепі наш необходимый каждому до штоденного ужитка артыкул. За офертами писати:

Венедыкт Волявский
Краков
ул. Рыдльовка 24.

ОПАМ'ЯТАЙТЕ СЯ, БО ЗЛЕ СЯ БАВИТЕ.


Со Шкляр, коло Рыманова, повіта сяноц-кого доносят нам о двох барз смутных слу-чаях, які мали там місце, а именно:

1) Господарови Теодорови Бобикови выбили украинскы хулиганы окна и наляли до студні ропы за того, же он звернул увагу о. Ярославу Щербі, же тот послідный не выпоминат на ектениях слов: „И за вся православныя Християны“.

2) Андрей Гарайда со своим сыном Теодором напали на Ваня Гарайду в часі, коли он рубал на своем дворі дырва и Теодор Гарайда ударил якимси желізом Ваня так сильно в голову, же тот утратил сознанє. Оказало ся потом, же выбил ему два зубы. Справу отдано до суду.

Сут то барз смутны случаи, котры свидчат, же в селі живут ище люды дикы и некультурны, котры колом хотят выбороти собі послух и почитанє для своих комунистичных ци тыж украинскых идей.

При том дивує нас и отвага священника-украинца, котрый помимо выразного приказа со стороны нашего Владыкы, Апостольского Администратора, штобы с тексту находячого ся в церковных книгах нич не зміняти ани не опущати, сміє своєвольно тот текст зміняти. Таким упорным священником займут ся напевно наши церковны власти и поучат его, як має поступати. Тым знова воюючим за „самостийну“ и за „интернационалну пролетарску“ можеме сказати лем одно: „перестанте, бо зле ся бавите; терпеливость нашего хлопа єст велика, але як она урве ся, то втотчас буде с вами біда напевно.“



СПРОСТОВАНЄ.

В 29. ч. Лемка с дня 7. серпня появила ся нотатка п. з. „Як не помагаш не шкод“, в котрой зашмарюют мені члєны чит. им. М. Качк. в Полянх, што я ділаю на шкоду той читальні. В виду того, што тота допись кривдит мене, прошу помістити слідуєче спростованє:

1) Неправда єст, што я ворожо относил ся до чит. им. М. Качковского в Полянх и перешкаджал в ей открытє, а правда єст, што я, яко войт, был першим основателем и першим членом той читальні ище в р. 1932.

2) Неправда єст, што я веду якіси контакты с жидами и што я большевицкий дыригент, а правда єст, што тот член читальні, котрый тото на мене писал, хотіл заложити якуси читальню „Просвіты“ и спроваджат до нашой читальні украинскы газеты як „Наш Лемко“ и другы.

3) Неправда єст, што я розбивам читальняков денатурком и сигаретками, а правда єст, што я все попереам читальню, котру уважам за свою.

4) Неправда єст, што я продаю громадскый ліс на свои потреби, бо так комиссия лісова, як и ревизийна переглянули книги и нашли вшитко в порядку, не бракло ани гроша.

Данько Мудрый
солтыс Полян.

Што чути в світі.

В Токио столица Японии) японскый подполковник убил шефа кабинета, министра военных діл, генерала Нагата. Подполковник вошел до кабинета генерала и зарубал его шавльом. Бєсідуют, же виновник дїйствовал от рамени якоїси организации, недовольной дотеперешном политыком военного министра. Правительство предприняло крокы до подавления заговора и опанованя напряженого положеня.

На Венграх спричинала долга посуха великы страты в господарствах рольных. Урожай кукурудзы єст о половину меньший от лонского, посуха понижила пашу, а картоплі сут дакады величины орїхов. Недостаток паши спричинил поднесенє цін молока, масла и мяса.

Во Франциі пришло до кривавых розрухов в двох военных портах Тулоні и Брєсті. Розрухы трєвали через три дні. Розрухы начали ся штрайком, котрый сорганизовали работники на знак протеста против пониженя платні. Положенє тото выкористали комунисты и довели до чинного опора против полиции и войска. Убито 5 люда, раненых єст понад 200.

В других містах франции были также розрухы. Єст то робота комунистов, котры хотят допривадити до революции во франции.

В Америкі будуют серед скал великый подземельный дом крїпость, обведеный желізобетоном и стальовыма стїнами. В том подземельном помїщеню має Америка переховати державне золото. Америка має у себе 40 % золота цілого світа. Єст тото золота так дуже, же єсли бы закрал ся там злодій, то мусл бы 140 тысяч раз наполняти ним мішок такый, котрый потрафил бы вынести. Золота того выстарчило бы, штобы вшиткым людам, які живут на світі вставити по 2 золоты зубы.

Вісти с краю.

С округа новосандецкого кандыдуют до Сейма Павел Гут, Михал Баляра, б. посол Феликс Гвиждж, Якуб Бодзьоны, и Ян Лободзинскый. Три перши с Нового Торга, два послідны с пов. новосандецкого.

В познаньском воєводстві єст така посуха, же буракы и картоплі вянут на полях. В дакотрых повітах не было доща от 8. мая. В студнях повысыхала вода.

С Греции привозят до Польщи 400.000. килограмов фиг и родзенок.

В Польщи єст 151.914. военных инвалидов, в том числі 89.776 с утратом трудоспособности до 44.00 2.033 на 10000. Крім того єст 19.717 таких инвалидов, котрым признано инвалидскы права часово.

В доплыві рікы Буг зловили недавно величезну рыбу - осетра, котрый важил 90 килограмов и был долгый 2 метры 39. центым.

В Новом Санчи три раз хотїла отобрати собі житє молода дївчина, Стефания Цвик. Причина того недостаток и біда.

Коло Лодзи спалило ся праві ціле місточко. Згорїло 96 домов. Около 2000 людеи остало ся без даху над головою.

Коло Грибова напали на торі желізнодоро. три бандыты на жел-дор. работников и помимо обороны обрабовали их и утекли. Забрали 120 зл. и фляшку вина.

На Воляни ціна зерна обнижила ся значно. Жито продают там по 1 зл. 30 гр. за пуд (16.4 кг.) а пшеницу по 2 зл. 10 гр. за пуд.

Пчєлы убили два коні. В селі Вязовница коло Ярослава два запряжены до драбняка коні вошли до саду, где была пасїка и возом перевернули 10 пней пчол. Подражнены пчолы шмарили ся на коні и пожалили их так сильно, же не дало ся их уратовати.

В Поворознику коло Крыницы переїзджал возом через желізный тор Данько Тылищак с Крыницы и аж на торі спостерег надїзжаючий поїзд. Закля он выцофал ся, надїхал поїзд, завадил о дышель и вывернул воз. На счастье машинист задержал поїзд и не было жертв в людях.

В Новом Санчі дївчинка запаляла так неосторожно примус, же запалил ся спирт во флящці, а от него ціла одєжда на дївчинці. Попарену отвезли до шпиталя.

В неділю, дня 1. вересня 1935

о годині 2-гой пополудни
состоит ся в помїщеню Руской Бурсы
в Горлицях

СОВІЩАНЄ ДЕЛЕГАТОВ КООПЕРАТИ-
ВОВ ЛЕМКОВЩИНЫ В ДІЛІ ПРИ-
НАДЛЕЖНОСТИ КУ РЕВИЗИЙНОМУ
СОЮЗУ.

Всі кооператывы Лемковщины про-
симє выслати своих делегатов.

Правленє кооп. Прогрес
в Крыниці.